

四庫全書

史部

欽定四庫全書

欽定續通志卷二百九十六

列傳

五代

十六

李愚

盧尊

司空頊

馬肩孫

劉岳

馬縞

盧損

崔居儉

崔稅

李憚

趙瑩

馮玉

盧質

呂琦

薛融

何澤

王權

史圭

龍敏

李崧

賈緯

段希堯

張允

王松

裴皞

王仁裕

裴羽

王延

李愚字子晦渤海無棣人謹重寡言好學為古文滄州節度使盧彥威以為安陵主簿丁母憂去後遊關中劉

季述幽昭宗愚以書說韓建使圖興復其言甚壯建不
能用乃去之洛陽舉進士宏詞為河南府參軍白馬之
禍復去之山東與李延光相善延光以經術事梁末帝
為侍講數稱薦愚愚由此得名久之拜左拾遺崇政院
直學士衡王友諒末帝兄也梁大臣李振等皆拜之獨
愚長揖末帝以責愚曰衡王朕拜之卿獨揖可乎對曰
陛下以家人禮見之拜宜也臣于王無所私豈宜妄有
所屈

謹按通鑑新覽

御批有道則見無道則隱士君子出處之正也李愚既自負
學行豈宜臣事末深既為爵祿所囑受而弗却徒以長揖
藩王顯其抗直昧大節而
矜細行所謂欲蓋彌彰耳坐言事忤旨罷為鄧州觀察判

官唐莊宗滅梁愚朝京師唐諸公卿素聞愚學古重之
拜主客郎中翰林學士魏王繼岌伐蜀辟愚都統判官
蜀道險議者謂宜緩師待變而進郭崇韜以決于愚愚
曰王行荒怠人厭其政宜乘其無備擊之利在速不可
緩也崇韜以為然遂以滅蜀初軍行至寶雞招討判官
陳人稱疾請留愚請斬以徇由是軍中無敢言留者明

宗即位累遷兵部侍郎承旨明宗祀天南郊愚為宰相
馮道趙鳳草加恩制道鄙其詞罷為太常卿任園罷相
乃拜愚中書侍郎同平章事愚為相不治第宅借延賓
館以居有疾明宗遣宦官視之見其敗氈敝席四壁蕭
然明宗嗟嘆命以供帳物賜之潞王反兵犯京師愍帝
夜出奔明日愚至端門欲入中書候太后進止馮道曰
潞王已處處張勝招安今即至矣何暇俟太后旨耶乃
相與出迎廢帝入立罷道出鎮同州以劉昫為相昫性

褊急而愚素剛介動輒違戾昉與馮道姻家愚素惡道
為人遇事輒以誚昉兩人遂相誼詬乃俱罷愚守左僕
射是時兵革方興天下多事而愚為相欲依古以創理
乃請頒唐六典示百司使各舉其職州縣貢士作鄉飲
酒禮時以其迂濶不用廢帝嘗謂愚等無所事目之曰
此粥飯僧耳清泰二年卒

盧遵字熙化范陽人唐末舉進士為監察御史唐亡事
梁累遷左司郎中侍御史知雜事以病免唐明宗時召

拜右諫議大夫遷中書舍人潞王兵入京師愍帝出奔
宰相馮道李愚集百官于天宮寺將出迎潞王百官久
而不集惟導與舍人張昭先至馮道請導草牋勸進導
曰潞王入朝郊迎可也勸進之事豈可輕議道曰勸進
其可已乎導曰今天子蒙塵于外遽以大位勸人若潞
王守節不回以忠義見責其將何辭以對且上與潞王
皆太后子不如率百官詣宮門取太后進止語未終有
報曰潞王至矣京城巡檢使安從進催百官班迎百官

紛然而去潞王止于正陽門外道又促導草牋導對如
初李愚曰吾輩罪人盧舍人言是也乃已導後事晉為
吏部侍郎天福六年卒

司空頤貝州清陽人唐僖宗時舉進士不中去為羅紹
威掌書記紹威卒入梁為太府少卿楊師厚鎮天雄頤
解官往依之師厚卒賀德倫代之張彥之亂命判官王
正言草奏詆斥梁君臣正言素不能文又為兵刃所迫
汗浹背不能下筆彥怒推正言下榻顧書吏問誰可吏

即言頤馳騎名之頤為亂兵劫其衣以敝服蔽形而至
見彥長揖神氣自若揮筆成文而言甚淺鄙彥以其易
曉甚喜即給衣服僕馬以為德倫判官德倫以魏博降
晉晉王兼領天雄仍以頤為判官

按資治通鑑勸晉王
除張彥澤乃頤之謀

梁晉相距河上常以頤權軍府事頤為郭崇韜所惡崇
韜數言其受賂都虞候張裕多過失頤屢以法繩之頤
有姪在梁遣家奴召之裕擒其家奴以為通書于梁莊

宗族殺之

按五代史此下有劉昫
盧文紀傳今改入貳臣

馬肩孫字慶先棣州商河人

按資治通鑑作滿河註隋置滿河縣屬渤海郡唐屬

棣州詳史亦作滿河

舉進士為唐潞王從珂河中觀察支使從珂

罷居京師肩孫從而不去從珂為京兆尹徙鎮鳳翔以
為觀察判官及將舉兵反與將吏韓昭肩等謀議已定
召肩孫告之曰受命移鎮路出京師何向為便肩孫曰
君命召不俟駕今大王為國宗屬而先帝新棄天下臨
喪赴鎮臣子之道也左右皆笑其愚然從珂心獨重之
既入立以為戶部郎中翰林學士久之拜中書侍郎同

中書門下平章事肩孫不通世務事多壅塞當時號為
三不開謂其不開口議論不開印行事不開門延士大
夫也晉兵起太原廢帝至河陽肩孫自洛來朝行在時
已危迫人皆冀其有所建說肩孫獻綾三百匹而已晉
高祖入立罷歸里肩孫少學韓愈為文多斥浮屠氏之
說及罷歸乃反學佛撰法喜集佛國記行于世後以太
子賓客分司居洛陽周廣順中卒

按五代史此下有姚
觀傳今改入貳臣

劉岳字昭輔洛陽人唐民部尚書政會八代孫崇龜崇

望其諸父也。岳名家子，好學敏于文辭，舉進士，事梁為左拾遺、侍御史。末帝時，為翰林學士，累官兵部侍郎。梁亡，貶均州司馬，復用為太子詹事。唐明宗時，為吏部侍郎，故事吏部文武官告身皆輸朱膠紙軸錢，然後給品高者則賜之，其官卑而貧者不能輸錢，往往但得敕牒而無告身。岳以為制辭或任其材能，或褒其功行，或申以訓誡，受官者不給告身，皆不知受命之所以然。請一切賜之，由是百官皆賜告身。宰相馮道、本田家子，貌質

野旦入朝兵部侍郎任贊與岳在後道行數反顧贊問岳道反顧何為岳曰遺下兔園冊爾兔園冊者鄉校俚儒教田夫牧子之所誦也道間之大怒徙岳祕書監李愚為相遷岳太常卿初鄭餘慶嘗採唐士庶吉凶書疏之式雜以常時家人禮為書儀兩卷明宗見其有起復冥昏之制嘆曰儒者所以崇孝悌而敦風俗且無金革之事起復可乎婚吉禮也用于死者可乎乃詔岳還文學通古今之事共刪定之岳與太常博士段頤田敏等

增損其書公卿家頗遵用之然其訛謬不經之類甚多
岳卒于官贈吏部尚書

馬縞不知其家世再舉明經宏詞為梁太常少卿以知
禮稱唐莊宗時累遷中書舍人刑部侍郎權判太常卿
明宗入立繼唐太祖莊宗而不立親廟縞言漢諸侯王
入繼統者必別立親廟光武皇帝立四親廟于南陽請
如漢故事立廟申孝享明宗下其議禮部尚書蕭頊等
請如縞議宰相鄭珏等引漢桓靈為比謂宜定諡四代

祖考為皇置園陵事下太常博士王丕議漢桓帝尊祖
孝穆孝崇皆為皇帝縞以為孝穆孝崇有皇而無帝惟
吳孫皓尊其父和為文皇帝不可為法右僕射李琪等
議與縞同明宗下詔欲兼用皇帝乃命宰臣集百官于
中書各陳所見李琪等稱尊祖禰為皇帝曾高為皇宰
相鄭珏合羣議奏曰禮本人情隨時損益開元時尊
陶為德明皇帝涼武昭王為興聖皇帝皆立廟京師請
用唐家故事四代祖考皆加帝如詔旨仍立廟京師詔

可加帝而立廟應州劉岳修書儀所增損皆決于縞嘗
坐覆獄不當貶綏州司馬復為太子賓客遷戶部兵部
侍郎盧文紀作相以其迂儒鄙之改國子祭酒卒贈兵
部尚書

盧損范陽人少學為文性剛介梁開平初舉進士與任
贊劉昌素薛鈞高總同年所在相詬及昌素贊居要地
損愈自引異不相親狎左丞李琪素薄昌素為人常善
待損琪有女弟眇年長婚對不售乃以妻損損慕琪聲

稱納之及琪為相損累遷右司員外郎唐天成初由史館修撰轉諫議大夫屢上書言事詞理鄙陋清泰時盧文紀為相密與損參決時政末帝即位以為御史中丞拜命之日以憲司不能振舉綱領致風俗頹壞乃大為條奏而有平明放鑰日出守端之語大為士流嗤鄙未幾坐誤詳赦書失出罪人罷晉天福中復用為右散騎常侍

按通鑑載天福三年以閻主祀為閻國王以左散騎常侍盧損為冊禮使又冊府元龜載損使于閻

和不如迎不接見但遣其子繼恭陳主禮而已

轉秘書監頗怏怏不得志即拜

章辭位乃授戶部尚書致仕居潁州廣順三年卒

按歐史盧

捐有目無傳或當時撰述闕漏抑流傳脫簡今採薛史補

崔居儉清河人美文辭少舉進士梁貞明中為中書舍人翰林學士御史中丞唐莊宗時為刑部侍郎太常卿崔氏自後魏隋唐與盧鄭皆為甲族吉凶之事各著家禮至其後世子孫專以門望自高為世所嫉明宗崩居儉以故事為禮儀使以祖諱螽辭不受宰相馮道即徙秘書監居儉怏怏失職後歷兵吏部侍郎尚書左丞戶

部尚書晉天福四年卒贈右僕射居儉拙于為生居顯官衣服常乏死之日貧不能葬聞者哀之

崔稅字子文深州安平人父涿唐末為刑部郎中稅少好學工文辭梁貞明三年舉進士甲科開封尹王瓚辟掌奏記性至孝父病不肯服藥稅屢進不納賓客問疾者稅輒迎拜門外涕泣告之涿終不服藥而卒稅居喪哀毀除服唐明宗以為監察御史不拜踰年再命乃拜累遷都官郎中翰林學士晉高祖時以戶部侍郎為學

士承旨權知天福二年貢舉初稅為學士嘗草制為宰相桑維翰所改稅以唐故事學士草制有所改者當罷職乃引經據爭之維翰頗不樂而稅少專文學不能莅事維翰乃命稅知貢舉果不能舉職時有進士孔英者素有醜行稅既受命往見維翰維翰素尊嚴而語簡謂稅曰孔英來矣稅不論其意乃考英及第物議大非之即罷學士拜尚書左丞遷太常卿八年高祖詔太常復文武二舞詳定正冬朝會禮及樂章稅與御史中丞竇

貞固刑部侍郎呂琦禮部侍郎張允等草定之以風痺
改太子賓客分司西京卒

李憺京兆人少好學工文辭唐末舉進士為祕書省校
書郎集賢校理事梁為中書舍人翰林學士梁亡責授
懷州司馬遇赦量移稍遷衛尉少卿天成中復為中書
舍人翰林學士累遷尚書右丞承旨時右散騎常侍張
文寶知貢舉所放進士中書有覆落者乃請下學士院
作詩賦為貢舉格學士竇夢徵張礪等所作不工乃命

惲為之惲笑曰予少舉進士登科蓋偶然耳後生可畏
假令予復就禮部試未必不落第安能與英俊為准格
聞者多其知體復遷刑部尚書分司洛陽卒

按五代史
此下有和

惲傳今改

入貳臣

趙瑩字玄暉華州華陰人初為梁將康延孝從事晉高
祖為保義節度使以瑩掌書記徙鎮常以瑩從高祖將
起兵太原以問諸將吏將吏多贊成之瑩獨勸毋反高
祖雖不用其言心甚愛之及即位拜翰林學士承旨戶

部侍郎同中書門下平章事累拜中書令出為晉昌軍
節度使開封尹是時出帝童昏馮玉李彥韜等用事與
桑維翰爭權共譖去之以瑩柔而易制故復引為相契
丹滅晉瑩從出帝北從事托允為太子太保周太祖與
契丹通好遣尚書右丞田敏使契丹遇瑩于幽州瑩見
敏悲不自勝瑩子易則易從瑩之北與易從俱而易則
留事漢後瑩病將卒告契丹願以尸還中國契丹許之
及卒遣易從護喪南歸贈太傅

馮玉字環臣定州人少舉進士不中馮資為河東節度使辟為推官入拜監察御史累遷禮部郎中為鹽鐵判官晉出帝納玉姊為后玉以后戚知制誥拜中書舍人玉不知書制誥常倩同官殷鵬代為之頃之玉出為潁州團練使拜端明殿學士戶部侍郎遷樞密使中書侍郎同中書門下平章事時馮皇后用事軍國大務一決于玉玉嘗疾在告自刺史以上宰相不敢除授玉除中書舍人盧價為工部侍郎桑維翰以價資望淺不可由

是與桑維翰有隙維翰遂罷玉為相積賄巨萬契丹滅
晉張彥澤先以兵入京師兵士爭入王家掠其資一夕
而盡明日見彥澤猶謔笑自言願得持晉玉璽獻契丹
以冀恩獎彥澤不納出帝之北玉從入契丹為太子太
保周廣順三年其子傑自契丹逃歸玉懼以憂卒

盧質字子微河南人父望唐司勳郎中質幼聰慧善屬
文事唐為祕書郎丁母憂解職後遊太原晉王以為河
東節度掌書記質與張承業等定議立莊宗為嗣莊宗

將即位以質為大理使拜行臺禮部尚書欲以為相質性疎逸不欲任責固辭乃拜太原尹北京留守遷戶部尚書翰林學士從平梁權判租庸遷兵部尚書後為學士承旨天成元年拜匡國軍節度使三年拜兵部尚書判太常卿事歷鎮河陽橫海初梁已篡唐封哀帝為濟陰王既而酖殺之瘞于曹州同光三年莊宗將議改葬而曹太后崩乃止因故壟稍廣其封以時薦饗而已質乃建議立廟追諡諡曰昭宣光烈孝皇帝廟號景宗天

成四年八月戊申明宗御文明殿遣質奉冊立廟于曹州尋以議者言立廟稱宗而不入太廟非是乃復奏去廟號廢帝反鳳翔愍帝發兵討之竭帑藏賞軍而兵至鳳翔皆叛降廢帝悉將而東許以重賞及入立有司獻籍數甚少廢帝暴怒自諸鎮至刺史皆進錢帛助國用猶不足三司使王政請率民財以佐用乃使質與政等共議配率而貧富不均怨訟並起囚繫滿獄六七日間所得不滿十萬廢帝患之乃命質等借民屋課五月由

是民大咨怨晉高祖入立質以疾分司西京拜太子太保卒贈太子太師諡文忠

呂琦字輝山幽州安次人父克為橫海軍節度判官節度使劉守文與弟守光相攻守光敗死吏民立其子延祚以克為謀主已而延祚又為守光所敗克見殺守光族其家琦年十五見執將就刑克客趙玉紹監者曰此吾弟也監者信之縱琦去琦足弱不能走玉負之行逾數百里變姓名乞食以免琦乃遊學汾晉間唐莊宗鎮

太原以為代州軍事推官後為橫海趙德鈞節度推官
入為殿中侍御史明宗時為駕部員外郎兼侍御史知
雜事河陽主藏吏盜所監物下車巡獄獄吏尹訓納賂
反其獄其冤家訴于朝下御史臺按驗得訓贓狀奏攝
訓赴臺訓為安重誨所庇不與琦請不已訓懼自殺獄
乃辨蒙活者甚衆歲餘遷禮部郎中史館修撰長興中
廢帝罷居清化坊與琦同巷琦數往過之後廢帝入立
待琦甚厚拜知制誥給事中樞密院直學士端明殿學

士是時晉高祖鎮河東有二志廢帝患之琦與李崧俱備顧問多所裨畫琦言太原必引契丹為助不如先事制之契丹自明宗時托紐見殺策喇卜等俘在京師數遣使者來求輒不報而東丹王又亡入中國契丹由此數欲求和琦因言方今之勢不如與契丹通和如漢故事歲給金帛妻以女使彊藩大鎮外無所引援可弭亂心崧以語三司使張延朗延朗欣然曰苟能抒國患歲費縣官十數萬緡責吾取足可也因共建其事廢帝大

喜他日以琦等語問樞密直學士薛文遇文遇大以爲
非因誦戎昱社稷依明主安危托婦人之詩以誚琦等
廢帝大怒急召問琦等琦等察帝色怒急曰臣等爲國
計非與契丹求利于中國也帝愈怒曰卿等佐朕欲致
太平而若是邪崧等惶恐拜謝拜無數琦足力乏先止
帝曰呂琦彊項肯以人主視我邪琦曰陛下以臣等言
非罪之可也屢拜何益帝意稍解曰勿拜賜酒一卮而
遣之其議遂寢因遷琦御史中丞居數月復爲端明殿

學士其後晉高祖起太原果引契丹為助遂以亡唐琦
事晉為祕書監累遷兵部侍郎天福八年卒趙玉仕至
職方員外郎琦事之如父玉疾親嘗藥扶持及卒為主
喪玉子文度幼孤琦教以學如已子後舉進士及第

薛融汾州平遙人少以儒學知名唐明宗時為右補闕
直弘文館晉高祖鎮太原融為觀察判官高祖欲拒命
延賓佐問可否坐中或贊成之或恐懼不敢言融獨從
容對曰融本儒生爾軍旅之事未嘗學也進退存亡之

理豈易言哉高祖不之責及入立累拜左諫議大夫遷
中書舍人融曰文辭非臣所長也遂辭不拜時詔修洛
陽大內融上書切諫即詔罷其役遷御史中丞改尚書
右丞分司西京卒

何澤廣州人少好學長于歌詩舉進士為洛陽令唐莊
宗好田獵數踐民田澤乃潛伏草間伺莊宗過當馬諫
曰陛下未能一天下以休兵暴斂疲民以給軍食今田
將熟奈何恣畋游以害多稼使民何以出租賦吏何以

督民耕陛下不聽臣言願賜死馬前使後世知陛下之
過莊宗大笑為之止獵拜倉部郎中明宗時數上書言
事明宗幸汴州又欲幸鄴而人情不便大臣屢言不聽
澤伏閣切諫明宗嘉之拜吏部郎中史館修撰澤外雖
直言而內實邪佞嘗于內殿起居班退獨留以笏叩顙
北望呼曰明主明主聞者哂之五代之際民苦于兵往
往割股廬墓以規免賦役戶部歲給蠲符課州縣出紙
號為蠲紙澤言其弊明宗下詔悉廢之澤與宰相趙鳳

有舊數求為給諫鳳薄其為人以為太常少卿敕未出而澤先知之即稱新官上章自訴章下中書鳳等言澤未拜命而稱新官輕侮朝廷請坐法乃以太常少卿致仕居河陽年已七十尚希仕進即遣婢詣匭上章請立秦王為皇太子晉高祖時召為太常少卿卒

王權字秀山太原人唐左僕射起之曾孫舉進士為右補闕唐亡事梁為職方員外郎知制誥翰林學士累遷御史中丞唐莊宗滅梁貶權隨州司馬起為右庶子累

遷戶部尚書晉高祖時為兵部尚書高祖以父事契丹
權當奉使辭不行坐是停任踰年以太子少傅致仕卒
贈左僕射

史圭常山石邑人為晉寧樂壽縣令有善政縣人立碑
頌之郭崇韜鎮成德辟為從事明宗時為尚書郎安重
誨為樞密使薦圭直學士故事直學士職雖清而承頒
文書參掌庶務與判官無異重誨素不知書倚圭以備
顧問始白許圭升殿侍立樞密直學士升殿自主始改

尚書右丞判吏部銓事重誨敗死出主為貝州刺史罷
歸常山晉高祖立召拜刑部侍郎鹽鐵副使遷吏部侍
郎分知銓事有能名以疾罷卒

龍敏字欲訥幽州永清人少仕州攝參軍劉守光亂敏
避之滄州遂客于梁久不調敏素善馮道道為唐莊宗
從事潛往依之張承業辟為監軍巡官使掌奏記莊宗
即位召拜司門員外郎敏父盛式年七十餘而祖父年
九十餘皆在薨敏乃求為興唐尹事祖父以孝聞丁母

憂去職除服累拜兵部侍郎馮贇留守北京辟敏副留守贇入為樞密使敏拜吏部侍郎是時晉高祖起太原乞兵契丹唐廢帝在懷州趙德鈞父子有異志張敬達屯晉安勢甚危急廢帝問計從臣敏曰晉所恃者契丹也東丹王失國之君今在京師若以兵送東丹自幽州入西樓契丹且有內顧憂何暇助晉晉失契丹大事去矣又謂李懿曰敏燕人也能知德鈞德鈞為將督健兒守城嬰塹而已使當大敵奮不顧身非其能也今聞駕

前馬猶有五千願得壯者千匹健兵千人與勇將郎萬金自平遙沿山趨官砦且戰且行得半達則事濟矣懿為言之廢帝不能用為晉太常卿使吳越時奉使者見吳越王皆下拜敏獨揖之還遷工部侍郎乾祐元年瘍發于首卒贈右僕射

李崧涿州饒陽人幼能文章為鎮州參軍唐魏王繼岌為興聖宮使領鎮州節度使以推官李蕘掌書記崧謂掌書呂柔曰魏王皇子天下之望書奏之職非蕘所當

柔私使崧代為之以示盧質馮道皆稱善乃以為興聖
宮巡官拜協律郎繼岌與郭崇韜伐蜀以崧掌書記繼
岌殺崇韜人情不安崧乃召書吏三四人登樓去梯夜
以黃紙作詔書倒用都統印明旦告諭諸軍人心乃定
師還繼岌死于道崧至京師任園判三司用為鹽鐵判
官以內憂去職服除范延光居鎮州辟崧掌書記延光
為樞密使崧拜拾遺直樞密院累遷戶部侍郎端明殿
學士長興中明宗春秋高秦王從榮多不法晉高祖為

六軍副使懼禍求藩明宗選將鎮太原以備契丹高祖欲之樞密使范延光趙延壽等議以康義誠應選崧獨曰太原國之北門宜得重臣非石敬瑭不可也由是從崧議高祖深德之陰遣人謝崧曰為浮屠者必合其失蓋欲使崧終始成已事也其後高祖以兵入京師崧竄匿召為戶部侍郎拜中書侍郎同中書門下平章事兼樞密使高祖崩出帝即位以崧兼判三司與馮玉對掌樞密是時晉兵敗契丹于陽城趙延壽在幽州詐言思

歸以誘晉兵崧等信之初漢高祖掌親軍與杜重威同
制加平章事恥之怒不肯謝晉高祖遣和凝諭之乃謝
其後漢高祖出居太原重威代為侍衛使崧亦數稱重
威之材于是漢高祖以崧為排已深恨之崧又信延壽
之詐以為然卒以重威將大兵卒敗于中渡晉遂以亡

契丹耶律德光素聞崧名及入京師謂人曰吾破南朝

得崧一人而已乃拜太子太師

據遼史太宗紀大同元年以晉李崧為樞密使

薛史同

契丹北還命崧以族俱行留之鎮州其後滿達勒

棄鎮州崧與馮道等得還高祖素不悅崧又怨者譖言
崧為契丹所厚故崧遇漢權臣常惕惕為謙謹莫敢忤
初漢高祖入京師以崧第賜蘓逢吉崧家遭亂多埋金
寶逢吉悉有之并其西京田宅崧弟嶼嶼與逢吉子弟
同舍酒酣出怨言崧又以宅券獻逢吉逢吉尤不喜嶼
僕葛延遇為嶼商賈多乾沒其貲嶼答責之延遇夜宿
逢吉部曲李澄家以情告時高祖將葬睿陵河中李守
貞反澄乃教延遇告變言崧與其甥王凝謀因山陵放

火焚京師又以蠟丸書通守貞逢吉遣人召崧至第從
容告之崧知不免乃以幼女託逢吉逢吉送崧侍衛獄
崧出乘馬從者無一人恚曰自古豈有不死之人然亦
豈有不亡之國乎乃自誣伏族誅崧素與翰林學士徐
台符相善後周太祖立台符告宰相馮道請誅延遇道
以數經赦難之樞密使王峻多台符有義乃奏誅延遇

按五代史此下有李
麟傳今改入貳臣

賈緯鎮州獲鹿人少舉進士不中州辟參軍唐天成中

范延光鎮成德辟趙州軍事判官遷石邑令緯長于史
學唐自武宗已後無實錄史官職廢緯采次傳聞為唐
年補錄六十五卷論次雖多闕誤而喪亂之際事跡粗
存亦有補于史氏晉天福中為太常博士非其好也數
求為史職改屯田員外郎起居郎史館修撰與修唐書
丁內艱服除知制誥累遷中書舍人諫議大夫給事中
復為修撰漢隱帝寺詔與王仲寶儼等同修晉高祖出
帝漢高祖實錄初桑維翰為相常惡緯待之甚薄緯為

維翰傳言維翰死有銀八千錠翰林學士徐台符以為不可緯乃更為數千錠廣順元年實錄成緯求遷官不得由是怨望時宰相王峻監修國史緯書日歷多言當時大臣過失峻見之怒曰賈給事子弟仕宦亦要門閥奈何歷詆當朝之士使其子孫何以仕進言之高祖貶平盧軍行軍司馬明年卒

段希堯河內人歷仕州縣唐天成中為衛州錄事參軍

按歐史不言希堯在唐時官似希堯始終事晉不及二代不應入雜傳矣今據薛史補

晉高祖為

河東節度使以為判官高祖屯軍忻州軍中有擁高祖
呼萬歲者高祖惶惑不知所為希堯勸高祖斬其亂首
乃止高祖將舉兵與賓佐謀希堯以為不可及即位後
恩澤比諸將吏最薄久之稍遷諫議大夫使于吳越是
時江淮不通奉使者皆泛海希堯過海遭大風左右恐
懼希堯曰吾平生不欺汝等恃吾可無恐已而風止歷
萊懷棣三州刺史出帝時為吏部侍郎判東西銓事累
遷禮部尚書卒贈太子少保

張允鎮州人少為張文禮參軍唐莊宗討文禮允脫身降繁之獄文禮敗乃出之為魏州功曹趙在禮辟節度推官歷滄兗二鎮掌書記入為監察御史累遷水部員外郎知制誥廢帝皇子重美為河南尹掌六軍以允剛介乃拜給事中為六軍判官罷為左散騎常侍晉高祖即位屢赦天下允為駁赦論以獻時晉高祖方好臣下有言覽之大悅允事漢為吏部侍郎隱帝誅戮大臣京師皆恐允常退朝不敢還家止于相國寺周太祖以兵

入京師允匿于佛殿承塵墜而卒

王松父徽為唐禧宗宰相松舉進士後唐時歷刑部郎中晉高祖鎮太原辟松節度判官及即位拜右諫議大夫累拜工部尚書出帝北遷蕭翰立許王從益于京師以松為左丞相漢高祖入洛先遣人馳詔東京百官嘗授偽命者皆焚之使勿自疑由是御史臺悉斂百官偽敕焚之松以手指其胸引郭子儀自詣以語人曰此乃二十四考中書令也聞者笑之後松子仁寶為李守貞

河中支使守貞反松以子故上書自陳高祖憐之但使解職而已尋以疾卒

裴皞字司東河東人出于名家少好學性素剛急直而無隱唐光化中舉進士拜校書郎拾遺補闕事梁為翰林學士中書舍人事後唐為禮部侍郎皞喜論議每陳朝廷闕失多斥權臣改太子賓客以老拜兵部尚書致仕晉高祖時起為工部尚書復以老告拜右僕射致仕卒贈太子太保皞以文學在朝廷久宰相馬胤孫桑維

翰皆皞禮部所放進士後肩孫知舉放榜引新進士詣
皞謁世傳以爲榮維翰已作相嘗過皞皞不迎不送人
或問之皞曰吾見桑公于中書庶寮也桑公見我于私
第門生也何送迎之有人亦以爲當

王仁裕字德輦天水人少不知書以狗馬彈射爲樂年
二十五始就學以文辭知名秦帥辟爲判官秦州入于
蜀仁裕因事蜀爲中書舍人翰林學士蜀平仁裕事唐
復爲秦州節度判官王思同鎮興元辟爲從事思同留

守西京以為判官廢帝舉兵鳳翔思同戰敗廢帝得仁
裕聞其名不殺寘之軍中凡馳檄諸鎮詔書告命皆仁
裕為之以都官郎中充翰林學士晉高祖入立罷
為郎中歷司封左司郎中諫議大夫漢高祖時復為翰
林學士承旨累遷戶部尚書罷為兵部尚書太子少保
顯德三年卒贈太子少師仁裕曉音律晉高祖初定雅
樂宴羣臣于永福殿奏黃鍾仁裕聞之曰音不純肅而
無和聲當有爭者起禁中已而兩軍校鬪昇龍門外聲

聞于內人以為神與和凝皆以文章知名

裴羽字用化父贄相唐僖宗羽以父任為河南壽安尉
事梁為御史臺主簿改監察御史唐明宗時為吏部郎
中與右散騎常侍陸崇使于閩為海風所颺至錢塘是
時唐方絕錢鏐朝貢羽等被留經歲而崇卒後鏐遣羽
還羽求載崇尸俱歸鏐初不許羽以語感動鏐乃惻然
許之因附羽表自歸明宗得鏐表大喜由是吳越俱通
于中國羽護崇喪至京師及其橐裝還其家士人皆多

羽之義周太祖時為左散騎常侍卒贈戶部尚書

王延字世美鄭州長豐人少好學嘗以賦謁梁相李琪
琪薦為即墨令馮道作相與延故人名拜左補闕遷水
部員外郎知制誥拜中書舍人權知貢舉吏部尚書盧
文紀與故相崔協有隙時協子頤方舉進士文紀謂延
曰吾嘗譽子于朝貢舉選士當求實效無以虛名取人
昔有越人善泅生子方晬其母浮之水上人怪而問之
則曰其父善泅子必能之若是可乎延退而笑曰盧公

之言為崔協也恨其父遂及其子邪明年選頌甲科人
皆稱其公累遷刑部尚書以太子少保致仕卒

按五代史此下

有馬重續趙延義
傳今改入藝術



欽定續通志卷二百九十六

欽定四庫全書

史部

欽定續通志卷二百九十八

中書臣李采覆勘

總校官原任侍講臣王燕緒

欽定四庫全書

欽定續通志卷一百九十七

列傳

宋

石守信

保興元孫

保言

王審琦

承衍克臣

高懷德

韓重贇

崇訓崇業

張令鐸

羅彥瓌

王彥昇

韓令坤

倫

慕容延釗

德豐
德琛

符彥卿

石守信開封浚儀人始事周祖得隸帳下廣順初累遷
親衛都虞候從世宗征晉陽遇敵高平力戰又從征淮
南關南俱著戰功累遷殿前都虞候轉都指揮使領洪
州防禦使

按東都事
畧作江州

恭帝立加領義成軍節度太祖即

位遷侍衛馬步軍副都指揮使改領歸德軍節度李筠
之變與高懷德率前軍破筠衆于長平又敗之于澤州
澤潞平加同平章事李重進起兵揚州以守信為行營

都部署兼知揚州行府事帝親征至大儀頓守信馳奏
城破在朝夕大駕親臨一鼓可平帝亟赴之果克其城

建隆二年移鎮鄆州兼侍衛親軍馬步軍都指揮使初

按宋史本傳作乾德初因晚朝與石守信等飲酒考李
燾通鑑長編係建隆二年七月戊辰日事史叙出鎮之
由故用初字乾德
二字衍文今刪帝因晚朝與守信等飲酒酒酣曰我

非爾曹不及此然吾為天子殊不若為節度使之樂吾
終夕未嘗安枕而卧守信等頓首曰今天命已定誰復
敢有異心陛下何為出此言帝曰人孰不欲富貴一旦

有以黃袍加汝身雖欲不為其可得乎守信等謝曰臣
愚不及此惟陛下哀矜之帝曰人生駒過隙爾不如多
積金帛田宅以遺子孫歌兒舞女以終天年君臣之間
無所猜嫌不亦善乎守信等謝曰陛下念及此所謂生
死而肉骨也明日皆稱病乞解兵權帝從之

按孟酒釋
兵權宋人

推為一時大計後世亦艷稱之不知宋祖英勇久為諸
臣所折服故一經示意遂皆頽聽其事在魁柄之獨操
而不在秘計之持出且宋祖素言自有天命何復介介
于諸鎮兵權毋乃先歎己心遂不能篤信天命耶伏讀
通鑒

輯覽

御批宋君臣有知應
亦心悅誠服矣

皆以散官就第

按宋初州郡事悉歸知州通判節度使雖莅鎮

亦無所掌且諸人或
違領故曰散官也

賞賚甚厚已而太祖欲使符彥卿

管軍趙普屢諫以為彥卿名位已盛不可復委以兵權
太祖不從宣已出普復懷之太祖迎謂之曰豈非符彥
卿事耶對曰非也因奏他事既罷乃出彥卿宣進之太
祖曰果然宣何以復在卿所普曰臣託以處分之語有侏
儻者復留之惟陛下深思利害勿復悔太祖曰卿苦疑
彥卿何也朕待彥卿厚彥卿豈負朕耶普對曰陛下何

以能負周世宗太祖默然事遂中止開寶六年加兼侍
中太平興國初加兼中書令二年拜中書令行河南尹
充西京留守三年加檢校太師四年從征范陽坐失律
責授崇信軍節度兼中書令俄進封衛國公七年徙鎮
陳州復守中書令九年卒年五十七贈尚書令追封威
武郡王謚武烈子保興保吉

按宋史石守信傳前有范
質王溥魏仁浦三傳俱改

入貳
臣

保興字光裔本名保正太祖取興宗之義改之建隆初

年十四以蔭補供奉官明年遷尚食副使太祖嘗召功臣子弟詢以時事保興年最少應對明白太祖奇之拜如京使太宗征河東為御砦四面都巡檢太平興國八年出為高陽關監軍守信卒起復領本州團練使雍熙初契丹侵邊為澶州前軍駐泊李繼遷入鈔徙銀夏綏府都巡檢使嘗巡按鞬子砦並黑水河趣谷中夏人以數千騎渡河邀戰保興所部不滿二千人乃分短兵伏於河澌俟其半渡急擊之斬首百餘級追北數十里優

詔褒美端拱中為西京都巡檢使淳化五年真拜蘄州團練使為永興軍鈐轄改夏綏麟府州鈐轄至道二年徙延州都巡檢使兼署州事改本路副都部署與范延

名等五路討賊

按宋史太宗本紀及夏國傳俱作范廷名副李繼隆分五路進討西夏時廷名

出延州保興為本路副都部署故與范廷名同日出師本傳作重名誤今據改

有節奇羅尼

舊作

皮伽羅賊今改正

數族率衆來拒保興選敢死士數百人銜枚

夜擊殲之自是烏頁允頁諸族歸降還至烏白池賊又為方陣來拒保興麾衆出入陣中會乘馬中流矢挺身

持滿易駢奮呼且行且鬪凡三日四十二戰賊遂引去
咸平二年知威虜軍會夏人入鈔保興發官帑錢數萬
緡分給戰士主者固執不可保興曰城危如此安暇中
覆事定覆而不允願以家財償之夏人退驛置以聞真
宗貸而不問三年就拜棣州防禦使徙知邢州改澶州
五年以疾求歸京師卒年五十八子元孫

保吉字祐之初以蔭補天平軍衙內都指揮使尚太祖
女延慶公主拜左衛將軍駙馬都尉累遷朔州觀察使

威塞軍節度雍熙中歷知河陽大名府連改橫海安國
二鎮節度真宗即位加檢校太尉保平軍節度車駕北
巡命為河北諸路行營都部署屯定州景德初改武寧
軍節度同平章事幸澶淵命與李繼隆分為都排陣使
軍於北門外契丹騎數萬驟至城下保吉不介馬而馳
當其鋒契丹兵引去俄請盟錫宴射於行宮後苑帝謂
繼隆等曰北敵畏威服義息戰安民卿等力也保吉進
曰臣受命禦患上稟成算至于布列行陣指授方畧皆

出于繼隆繼隆曰宣力用心躬率將士臣不及保吉帝
嘉其協和賜以襲衣帶馬改鎮鎮安大中祥符二年卒
年五十七贈中書令謚莊武

按東都事
畧作壯武

初守信鎮陳年

五十七卒及保吉繼是鎮卒年相同談者異之子貽孫
任崇儀使孝孫西京左藏庫使

元孫字善長始名慶孫避章獻太后祖諱易之以守信
謚為東頭供奉官閤門祗候累遷如京副使仁宗即位
改文思副使為澶州巡檢徙知莫州有治迹又徙保州

領廉州刺史兼廣信安肅軍緣邊都巡檢時開屯田鑿塘水有訟元孫擅污民田者遣官按視訟者以証服詔褒諭之再遷西上閤門使并代州兵馬鈐轄歷侍衛親軍步軍殿前都虞候廊延副都總管緣邊安撫使遷邕州觀察使康定初夏人寇延州元孫與戰于三川口軍敗見執傳者以為已死贈忠正軍節度使兼太傅錄其子孫七人及元昊納款縱元孫歸諫官御史奏元孫軍敗不死辱國請斬塞下賈昌朝獨言曰在春秋時晉獲

楚將穀臣楚獲晉將知罃亦還其國不誅因入對探袖
出魏志于禁傳以奏曰前代將臣敗覆而還多不加罪
帝乃貸元孫安置全州以升祔赦內徙襄州侍御史劉
湜言元孫失軍辱命朝廷貸而不誅若例從量移無以
勸用命之士元孫遂不徙後徙許州還京師卒

王審琦字仲寶其先遼西人後徙家洛陽漢乾祐初隸
周祖帳下性純謹甚親任之李守貞平署廳直左番副
將從世宗征劉崇力戰有功累遷鐵騎都虞候俄領勤

州刺史親征淮南舒州堅壁未下詔以郭令圖領刺史
命審琦及司超以精騎攻其城一夕拔之令圖既入城
審琦等遂救黃州數日令圖為舒人所逐審琦選輕騎
銜枚夜發信宿至城下大敗舒人令圖得復還治所又
破南唐軍于紫金山世宗圍濠州審琦先拔其水砦奪
月城濠州遂降及攻楚州為南面巡檢城將陷審琦意
淮人必遁設伏以待城中兵果鑿南門而潰伏兵擊之
斬獲甚多淮南平又從平瓦橋關積官至殿前都虞候

領睦州防禦使太祖即位擢為殿前都指揮使領泰寧

軍節度從征李筠為御營前洞屋都部署澤潞平改領

武成軍節度

按東都事畧作義成軍

李重進起兵副石守信為前

軍部署討之建隆二年出為忠正軍節度

按曾鞏隆平集作忠武軍

在鎮八年為政寬簡所部邑令以罪停其錄事吏幕僚

白令不先咨府請按之審琦曰五代以來諸鎮強橫令

宰不得專縣事今部內宰能斥去黠吏誠可嘉爾何按

之有聞者歎服開寶二年從征太原為御營四面都巡

檢三年改鎮許州六年與高懷德並加同平章事七年卒年五十贈中書令追封瑯琊郡王子承衍承衍承德承祐承俊承僊承僕承僅承休承德西上閤門使會州刺史承祐至如京使承俊承僊至內殿崇班承僊至閤門祇候承僅至左神武將軍致仕承休至內殿承制

承衍字希甫幼端謹審琦鎮兗海壽春皆署以牙職開

寶初補內殿供奉官都知三年尚太祖女昭慶公主授

右衛將軍

按公主傳作左衛將軍

駙馬都尉仍充都知踰年領恩

州刺史加本州防禦使太平興國七年授彰國軍節度
雍熙中出知天雄軍府兼都部署時契丹擾鎮陽候騎
至冀州去魏二百餘里鄰境戒嚴城中大恐屬上元節
承衍下令市中及佛寺然燈設樂與賓佐宴遊達旦人
賴以安明年召還復為貝冀都部署端拱初換永清軍
節度再知天雄軍吏民千餘詣監軍請為本道節帥詔
褒之咸平六年以疾求罷節鉞三抗表不許帝自臨問
至卧內慰勉久之卒年五十二贈中書令給鹵簿葬謚

恭肅子世安世隆世雄世融世安至崇儀副使通事舍
人世隆以公主子為如京副使累遷領平州刺史景德
初卒特贈泰州防禦使召見其三子賜名克基克緒克
忠皆面授供奉官世雄至內殿崇班世融為內殿承制

按東都事畧
作內園苑使

世融子克臣

按宋史此下有承衍附
傳無事蹟足錄今從刪

克臣字子難祖承衍尚秦國賢穆公主

按東都事畧
作賢肅公主

克

臣第景祐進士仁宗閱其文顧侍臣曰賢穆有孫登科
可喜也仕累通判壽州鼓角卒夜入州解擊郡將既就

擒而監兵使所部被甲操刃立庭中官吏駭觀克臣徐
言曰此不過為盜耳立遣甲者去戒兇卒勿妄引他人
衆謹服是日天貺節率掾屬朝謁如常儀入賴以安猶
坐貶監潭州稅熙寧中鄭俠以上書竄嶺表克臣嘗薦
俠且餽之白金又坐奪官復為戶部副使以集賢殿修
撰知鄆州京東多盜克臣請以便宜處決遂下諸郡使
械送尤桀者斬以徇盜為少袁河決曹村克臣亟築堤
城下或曰河決澶淵去鄆為遠且州徙於高八十年不

知有水患安事此克臣不聽役愈急隄成水大至不沒者才尺餘復起甬道屬之東平王陵埽人得趨以避水事寧皆繪像祀之進天章閣待制從知瀛州有告外間入境密旨趣具獄株連甚衆克臣陰緩之已而得為間者于他道徙知太原王中正西討罔功而誣克臣姑息士卒使無固志黜為單州明年拜工部侍郎至是神宗幸尚書省至部舍止輦獎其治力以為雖少者不及顧其子駙馬都尉師約使入覲元祐四年以龍圖閣直學

士太中大夫卒年七十六子師約字君授少習進士業
尚徐國公主授左衛將軍國朝故事主壻未嘗居職帝
始令師約同管當三班院試其才明年主就館乃罷宣
仁后臨朝師約屢上書言事元符初議者以為職不當
上言褫其秩徽宗即位乃復保平軍留後又為樞密都
承旨未幾復罷崇寧元年卒年五十九子殊主所生至
閬州觀察使

高懷德字藏用真定常山人周天平節度齊王行周之

子忠厚倜儻有武勇行周厯延潞二鎮及留守洛都節制宋亳皆署以牙職晉開運初契丹侵邊行周為北面前軍都部署懷德始冠願從北征行周壯之行至戚城遇契丹軍被圍數重援兵不至懷德左右馳射衆皆披靡挾父出以功領羅州刺史及行周移鎮鄆州改集州刺史仍領牙校又遷信州刺史從行周再鎮宋州晉末契丹南侵以行周為邢趙路都部署禦之留懷德守睢陽會杜重威降契丹京東諸州盜起懷德堅壁清野敵

不能入行周率兵歸鎮敵遂解去漢初行周移鎮魏博
及再領天平以懷德為忠州刺史領職如故周祖征慕
容彥超還過汶上寵賜行周甚厚并賜懷德衣帶鞍馬
行周卒召懷德為東西班都指揮使領吉州刺史改鐵
騎都指揮使太原劉崇入寇世宗討之以懷德為先鋒
都虞候高平克捷遷鐵騎右廂都指揮使領果州團練
使從征淮南知廬州行府事充招安使尋遷龍捷左廂
都指揮使領岳州防禦使南唐將劉仁贍據壽春舒元

據紫金山置連珠砦為援以抗周師懷德率數十騎覘其營壘夜涉淮遲明賊來戰懷德以少擊衆擒其裨將以還盡偵知其形勢強弱世宗一日因鞍轡淮壩以觀賊勢見一將追擊賊衆奪槩以還令左右問之乃懷德也召至慰勞許以節鉞及北征命與韓通率兵先抵滄州初得閩南又命副陳思讓為雄州兵馬都部署克瓦橋關降姚內斌以歸恭帝立擢為侍衛馬軍都指揮使領江寧軍節度

按五代史職方考及會要俱無江寧軍而韓重贊劉廷讓等傳亦作領江寧軍節

度與此並同攷唐書地理志昇州江寧郡乾元二年置江寧軍據此則唐時本有是名其地至五代久為吳南唐所據此係殿前管軍領職寔未嘗出鎮其地或當時沿襲舊名以此為大鎮之美號諸傳類此者甚多今並仍原文附識于此

又為北面行營馬軍都指揮使太祖即位拜

殿前副都點檢移鎮滑州克關南副都部署尚宣祖女

燕國長公主加駙馬都尉李筠起兵上黨帝將親征先

令懷德率所部與石守信進攻破筠衆於澤州南事平

遷忠武軍節度

按宋史公主傳燕國長公主再適忠武軍節度使高懷德是懷德尚主時已移鎮

忠武軍矣考長編建隆六年八月燕國長公主出降殿前副都點檢忠武軍節度使駙馬都尉高懷德與公主

傳合本傳作尚主以
後事當從公主傳

檢校太尉從平揚州改歸德軍節

度開寶六年加同平章事太宗即位加兼侍中又加檢
校太師太平興國四年從平太原改鎮曹州封冀國公
七年改武勝軍節度是年七月卒年五十七贈中書令
追封渤海郡王謚武穆子處恭至右監門衛大將軍

韓重贇磁州武安人少以武勇隸周祖麾下廣順初補
左班殿直副都知從世宗戰高平又從征淮南累遷控
鶴軍都指揮使領虔州刺史太祖即位擢龍捷左廂都

校領永州防禦使從征澤潞還代張光翰為侍衛馬步
軍都指揮使領江寧軍節度討李重進為行營馬步軍
都虞候建隆二年改殿前都指揮使徙領義成時有譖
重贊私取親兵為腹心者太祖怒欲誅之趙普諫曰親
兵陛下必不自將須擇人付之若重贊以讒誅即人人
懼罪誰復為陛下將親兵者太祖納其言重贊得不誅
後聞普嘗救已即詣普謝普拒不見五年出為彰德軍
節度開寶二年太祖征太原過其郡謂曰契丹知我是

行必率衆來援彼意鎮定無備必由此路入卿為我領
兵倍道兼行出其不意破之必矣乃命為北面都部署
重贊令軍士銜枚夜發果遇契丹兵于定州遂乘之大
破其衆七年卒贈侍中子崇訓崇業重贊與張光翰趙
彥徽分領諸軍節度嘉其翊戴功也光翰後唐山南節
度使虔釗兄子彥徽真定安喜人與太祖同事世宗太
祖兄事之卒俱贈侍中

崇訓字知禮以蔭補供奉官遷西京作坊副使出為瀘

州河南北都巡檢使從太宗征河東還以貝冀等州都
巡檢使權知麟州李繼遷寇夏州崇訓領兵赴援大敗
之徙監夏州軍厯知越泉登莫四州徙知威虜軍改加
京使咸平初出知石州屬繼遷犯境崇訓追襲之至賀
蘭山而還二年再知麟州又敗繼遷於城下崇訓由河
西徙閩越再移北邊凡二十五年以勞擢西上閣門使
邠寧環慶清遠軍都巡檢使徙鎮定高陽闕行營鈐轄
屯鎮州兼河北都轉運使事契丹兵至方順河將寇威

虜軍崇訓陳兵唐河扼其要路契丹遣別騎寇赤堠驛
崇訓分兵擒戮之敵遂遁去移并代鈐轄權知并州從
部署張進領兵由上門會大將王超襲破契丹于定州
又遷鎮定高陽馬步軍都鈐轄屯定州景德初契丹復
來侵至唐河崇訓陳兵河南翼日又與王超追襲至鎮
州既而都部署桑贊逗留不進崇訓帥兵獨往時車駕
幸澶州召崇訓乃還大中祥符二年授右龍武軍大將

軍

按東都市畧
作左龍武軍

領韶州防禦使以本官分司西京卒年

五十六崇訓為人長厚謙畏未嘗忤物子允恭禮賓副使有謀畧人以為能世其家云

崇業字繼源以蔭補供奉官選尚秦王廷美女雲陽公主授左監門衛將軍駙馬都尉廷美得罪去駙馬之號廷美卒起為靖難軍行軍司馬雍熙三年公主卒咸平四年改左屯衛大將軍領高州團練使追封公主為號國長公主五年卒年四十一子允升為內殿承制閤門祇候

張令鐸棣州厭次人少以勇力隸軍伍後唐清泰中補寧衛小校晉初改隸奉國軍漢乾祐中從周祖平河中遷奉國軍指揮使廣順初累遷本軍左廂都指揮使領虔州團練使從世宗征淮南移領虎捷左廂加常州防禦使再征壽春與龍捷右廂柴貴分為京城左右廂巡檢世宗將北征命與韓通高懷德領兵先赴滄州又副韓令坤為霸州部署率兵戍守恭帝立授侍衛親軍步軍都指揮使領武信軍節度使太祖即位征李筠以令

鐸為東京舊城內都巡檢建隆二年出為鎮寧軍節度
帝為皇弟興元尹光美娶其第三女開寶三年卒於京
師年六十贈侍中令鐸性仁恕嘗語人曰我從軍三十
年大小四十餘戰多摧堅陷敵未嘗妄殺一人及卒人
多惜之子守正至內園使守恩累遷崇儀使領綿州刺
史加西上閤門使知秦州

羅彥瓌并州太原人父全德晉沁州刺史彥瓌得補內
殿直出帝在澶州欲命使宣慰大名府時河北契丹騎

充斥遂募軍中驍勇士十人從行彥瓌備選銜枚夜發
往返如期繇是補興順指揮使開運末契丹主至汴遣
彥瓌送廐馬千匹赴幽薊彥瓌至元氏聞漢祖建號太
原以馬歸漢漢祖嘉之及入汴擢為護聖指揮使周初
遷散員都虞候坐樞密使王浚黨出為鄧州教練使世
宗嗣位從向訓收秦鳳有功遷散指揮都虞候顯德末
太祖自陳橋入歸公署見宰相范質等未及言彥瓌挺
劍而前曰我輩無主今日須得天子質等由是降階聽

命擢為控鶴左廂都指揮改內外馬軍都軍頭領眉州防禦使徙平澤潞還命代趙彥徽為侍衛步軍都指揮使領武信軍節度建隆二年出為彰德軍節度乾德二年改安國軍節度與昭義軍節度李繼勲大破契丹四年春又與閣門使田欽祚殺太原軍千餘人于靜陽擒其將鹿英等獲馬三百匹明年移鎮華州開寶三年卒年四十七

王彥昇字光烈性殘忍多力善擊劍號王劍兒本蜀人

後唐平蜀徙家洛陽因宦官驃騎大將軍孟漢瓊言於明宗補東班承旨晉天福中轉內殿直開運初契丹圍大名出帝幸澶淵募勇敢士齎詔納城中彥昇與羅彥瓌應之一夕突圍而入遷護聖指揮使周廣順中從向拱破太原兵虜亭南斬其帥王璋於陣世宗征淮南從劉崇進宋僭破金牛水砦又從李重進扞吳兵于盛唐又從張永德攻瀛州下束城以功累轉散員都指揮使太祖北征至陳橋為衆推戴彥昇以所部先入京遇韓

通於路逐至第殺之初太祖警軍入京不得有秋毫犯
及聞通死意甚不樂以建國之始不及罪彥昇拜恩州
團練使領鐵騎左廂都指揮使後為京城巡檢中夜詣
王溥第溥驚悸而出既坐乃曰此夕巡警甚困聊就公
一醉耳彥昇意在求賄溥佯不悟置酒數行而罷翼日
溥密奏其事乃出為唐州刺史乾德初遷申州團練使
開寶二年改防州防禦使是冬又移原州西人有犯漢
法者彥昇不加刑名僚屬飲宴引所犯以手捽斷其耳

大嚼卮酒下之其人流血被體股慄不敢動前後嚼者數百人西人畏之不敢犯塞七年以病代還次乾州卒年五十八太祖以其專殺韓通終身不授節鉞

韓令坤磁州武安人父倫少以勇敢隸成德軍兵藉累遷徐州下邳鎮將兼守禦指揮使世宗以令坤貴擢陳州行軍司馬及令坤領陳州徙倫許州罷職復居宛邱多以不法干郡政私酤求市利倍斂民財公私患之

按五

代史周家人傳世宗本生父柴守禮嘗殺人于市有司以聞世宗不問是時王溥汪晏王彥超韓令坤等同時

將相皆有父在洛陽與守禮朝夕往來項城民武郁詣
惟意所為洛陽人多畏避之號十阿父

闕訴其事命殿中侍御史率汀按之倫詐報汀云被詔
赴闕汀奏之追劾具狀法當棄市令坤泣請于世宗遂
免死流海島顯德六年為左驍衛中郎將遷左監門衛
將軍太祖即位拜亳州團練使改本州防禦使卒令坤
少隸周祖帳下廣順初領和州刺史世宗即位授殿前
都虞候俄賞高平之功為龍捷左廂都虞候領容州團
練使征太原為行營前軍馬軍都校未幾為侍衛馬軍

都指揮使領定武軍節度

按東都軍器作武定軍

世宗命宰相李

穀將兵征淮南俾令坤等十二將以從穀退保正陽為

吳人所乘令坤與宣祖李重進合兵進擊大敗吳人世

宗親征開揚州無備遣令坤及宣祖白延遇趙晁等襲

之命坤先令延遇以精騎數百遲明馳入城中不之覺

令坤繼至民皆按堵南唐東都副留守馮延魯為僧匿

寺中

按通鑑及十國春秋馮延魯傳延魯以工部侍郎出為東都副留守兵敗削髮為僧為周兵所獲史

誤為馬延魯令據改獲之送行在遂以令坤知州事由是泰州懼

以城降時錢俶受詔攻常潤圍毘陵為南唐所敗南唐
乘勝遣將陸孟俊逼泰州周師不能守孟俊遂進軍蜀
罔逼揚州令坤棄其城尋聞太祖與張永德領兵趨六
合來援復入城守大敗南唐兵擒孟俊向拱為緣江招
討使以令坤副之下壽州歸朝加檢校太尉領鎮安軍
節度使世宗復幸淮右次楚州遣令坤率兵先入揚州
權知軍府事揚州城為吳人所毀詔發丁壯別築新城
命令坤為修城都部署六年命令坤以汴亳民導汴水

入于蔡世宗將北征率兵先赴大名又副王晏為益津
關一路都部署俄為霸州都部署恭帝立詔防北邊太
祖即位移領天平軍加侍衛馬步軍都指揮使同平章
事太祖親征李筠詔令坤率兵屯河陽澤潞平加兼侍
中又從討李重進改成德軍節度充北面緣邊兵馬都
部署將赴鎮上於別殿置酒餞之因勗其為治

按李重進
長編載

建隆二年閏三月甲子罷慕容延釗為山南西道節度
使韓令坤為成德節度使自是殿前都點檢遂不復除
授丙戌韓令坤慕容延釗辭晏于廣政
殿自是節度使已上出使此鎮宴如儀
乾德六年卒年

四十六太祖素服發哀于講武殿錄其子慶朝為閑廐使慶雄為閑廐副使令坤有才畧識治道與太祖同事周室情好親密鎮常山凡七年北邊以寧聞其卒甚悼惜之追封南陽郡王

按本傳不載追封今據東都事畧增

慕容延釗字化龍

據東都事畧補

太原人父章襄州馬步軍都

校領開州刺史延釗少勇幹漢祖之興也周祖為其佐命以延釗隸帳下周廣順初補西頭供奉官世宗即位為殿前散指揮使都校高平之戰督左先鋒累遷殿前

都虞候領睦州防禦使從征淮南歸朝復為殿前都虞候出為鎮淮軍都部署顯德五年世宗在迎鑾江口聞吳人舟數百艘泊東沛洲命延釗與宋延偓水陸並進大破之淮南平遷殿前副都指揮使領淮南節度恭帝立徙鎮鎮寧充殿前副都點檢太祖即位延釗方握重兵屯真定帝遣使諭旨許以便宜從事延釗與韓令坤率所部兵按治邊境以鎮靜聞太祖嘉之加殿前都點檢同中書門下三品避其父名故也李筠之變命與王

全斌由東路會兵進討俄為行營都部署知潞州行府
事及平加兼侍中詔還澶州建隆二年表解軍職徙為
山南東道節度四年命師南征以延釗為湖南道行營
前軍都部署時延釗被病詔令肩輿即戎事擒賊將汪
端礫于市遂平荆湘加檢校太尉是冬卒年五十一初
延釗與太祖友善顯德末太祖任殿前都點檢延釗為
副常兄事延釗及即位每遣使勞問猶以兄呼之聞其
卒慟哭久之贈中書令追封河南郡王錄其子弟授官

者四人子德業德豐德鈞德業至衛州刺史德鈞至尚
食副使延釗弟延忠歷官磁州刺史延卿至虎捷軍都
指揮使延卿子德琛

德豐字日新幼聰悟延釗愛之嘗曰興吾門者必此子
八歲補山南東道衙內指揮使延釗卒授如京使開寶
中從征太原領御砦南面巡檢又為揚州都監征南唐
為洞子都監城既下命為昇州都監澤國富饒使者多
哀聚金帛德豐獨以廉潔聞俄領蔚州刺史太平興國

二年知慶州兼邠寧都巡檢居任以簡靜為治邊境安
之雍熙四年出為定遠軍鈐轄命領後陣中隊別將萬
騎以禦邊害淳化中知邢州三年改知延州以所部不
治徙知慶州又改靈州兼部署穀價湧貴德豐出私廩
賑饑民全活者衆賊入境率兵擊走之咸平二年遷客
省使知鎮州召對便坐撫慰甚至是冬契丹南侵德豐
繕兵固守餉饋不絕三年改滄州在西邊時毋留京師
妻孥寓長安貧甚真宗憫之特詔給團練使奉踰年進

潁州團練使知貝瀛二州五年卒年五十家無餘財談者善之子惟素至殿內承制

德琛以延釗蔭補供奉官累遷內殿崇班知夔州李順之亂賊酋張餘領衆十萬餘舟千艘來寇與順戰龍山又與白繼贊擊賊斬獲甚衆悉焚其舟賊剽開州圍雲安德琛往援又敗之歷轉崇儀副使荆湖北路鈐轄蠻擾澧鼎境上德琛戰于北汭奪耕牛鎧甲斬馘以歸徙峽路鈐轄未至復知夔州天禧初改右監門衛大將軍

卒

符彥卿字冠侯陳州宛邱人父存審後唐宣武軍節度
兼中書令彥卿年十三能騎射事莊宗於太原以謹愿
稱及長以為親從指揮使入汴遷散員指揮使郭從謙
之亂莊宗左右皆引去惟彥卿力戰射殺十數人俄矢
集乘輿遂慟哭而去天成三年討王都于定州大破契
丹于嘉山明年克其城授耀州團練使改慶州刺史晉
天福初授同州節度改左羽林統軍俄兼領右羽林改

鎮廊延出帝即位召還出鎮河陽三城契丹南侵詔彥卿率所部拒戰澶淵契丹騎兵數萬圍高行周于鐵邱諸將莫敢當其鋒彥卿獨引數百騎擊之契丹遁去行周得免移鎮許州封祁國公開運二年與杜重威李守貞經畧北鄙契丹主圍之于陽城軍中乏水人馬多渴死時晉師居下風將戰弓弩莫施彥卿謂張彥澤皇甫遇曰與其束手就擒曷若死戰然未必死彥澤等然之遂潛兵尾其後順風擊之契丹大敗改武寧軍節度同

平章事為左右所間會再出師河朔彥卿不預易其行
伍配以羸師數千戍荊州口及杜重威以大軍降于滹
水急詔彥卿與高行周領禁兵屯澶淵會彥澤引契丹
兵入汴彥卿與行周遂歸契丹時徐宋寇盜蠭起契丹
主遣彥卿歸鎮漢祖入汴彥卿自徐州來朝改鎮兗州
加兼侍中乾祐中加兼中書令封魏國公拜守太保移
鎮青州周祖即位封淮陽王移鎮鄆州魏府王殷得罪
即以彥卿為大名尹天雄軍節度進封魏王世宗初并

人擾潞州潞兵敗命彥卿領兵從磁州固鎮路壓其背
及帝親征命為行營一行都部署兼知太原行府事領
步騎二萬進討初彥卿之行也世宗以并人雖敗朝廷
饋運不繼未議攻擊且令觀兵城下徐圖進取及周師
入境汾晉吏民望風款接皆以久罹虐政願輸軍須以
資兵力世宗從之而連下數州彥卿等皆以芻糧未備
欲旋軍世宗不之省乃調山東近郡輓軍食濟之及世
宗至城下命與郭從義向訓白重贊史彥超率萬騎屯

忻口以拒北援又下孟縣契丹駐忻北遊騎及近郊史彥超以二千騎當其鋒左右馳擊彥超死之敗契丹衆二千餘契丹遁走先鋒為其所掩重傷數百人諸將論議矛盾師故不振世宗乃班師彥卿遣歸本鎮還京拜彥卿太傅改封魏王恭帝立加封太尉太祖即位加守太師建隆四年春來朝賜襲衣玉帶宴射于金鳳園太祖七發皆中的彥卿貢名馬稱賀開寶二年移鳳翔節度被病肩輿赴鎮至西京上言疾亟請就醫洛陽從之

假滿百日猶請具奉為御史所劾下留司御史臺太祖以姻舊特免推鞠止罷其節制八年卒年七十八喪事官給彥卿將家子勇畧有謀善用兵存審之第四子軍中謂之符第四前後賞賜鉅萬悉分給帳下故士卒樂為効死契丹自陽城之敗尤畏彥卿或馬病不飲齧必唾而咒曰此中豈有符王邪晉少主既陷契丹德光之母問左右曰彥卿安在或對曰聞已遣歸徐州矣德光母曰留此人中原何失策之甚其威名如此鎮大名十

餘年政委牙校劉思遇思遇貪黠怙勢歛貨財公府之
利多入其家彥卿不之覺時藩鎮率遣親吏受民租槩
量增溢公取其餘羨而魏郡尤甚太祖聞之遣常參官
主其事由是斛量始平詔以羨餘粟賜彥卿以愧其心
性不飲酒頗謙恭下士對賓客終日談笑不及世務不
伐戰功居洛陽七八年每春月乘小駟從家僮一二遊
僧寺名園優遊自適周世宗二后按五代史周家人傳
宣懿皇后崩于世宗
時宋初遷西宮號周太后淳化四年卒者后妹也
世宗二后皆彥卿女宋史本傳止載宣懿今改補

太宗

懿德皇后皆彥卿女也自恭帝及太祖兩朝賜詔書不
名子昭信昭愿昭壽昭信周顯德初卒贈檢校太保閬
州防禦使昭愿積官為天雄軍邢州二鈐轄拜本州防
禦使卒昭壽累遷鳳州團練使益州鈐轄為神衛卒趙
延順等所殺昭壽子承諒娶齊王女嘉興縣主按宋史此下有
昭愿昭壽附傳昭愿傳無事蹟足錄
昭壽事見後雷有終傳今並從刪

欽定續通志卷二百九十七

欽定四庫全書

欽定續通志卷二百九十八

列傳

宋二

王景

王晏

郭從義

武行德

楊承信

折德康

御勲御
卿克行

王承美

李繼周

孫全照

侯延廣

扈彥珂

王景萊州掖人家世力田少佃僅善騎射結里中惡少

為盜梁大將王檀鎮滑臺以景隸麾下後唐莊宗入汴

景來降累遷奉聖

按東都事
畧作奉國

都虞侯清泰末從張敬達

圍晉陽會契丹來援景以所部歸晉祖天福初授相州

刺史范延光據鄴叛屬郡多為所脅從景獨分兵拒守

晉祖幸鄴留為京城巡檢使開運二年契丹南侵出帝

幸澶淵景與高行周等大破契丹衆於戚城累拜橫海

軍節度契丹至汴以其黨伐景景歸次常山間梁丹主

殂即間道歸鎮漢乾祐初加同平章事會契丹饑幽州民多度關求食至滄州境者五千餘人景善懷撫詔給田處之周祖微時與景善及即位加兼侍中景起身行伍素無智畧然臨政不尚刻削民有訟必面詰之不至大過即諭釋去不為胥吏所搖部民便之廣順初入朝民遮道留之不獲有截景馬銙者俄以景為護國軍節度遷鎮鳳翔顯德初封褒國公加開府階世宗加兼中書令先是秦鳳陷蜀州旁蕃漢戶詣闕請收復景與向

拱率兵出大散關進討遂命景為西面行營都部署

按通

鑑作西面行營都招討使

大破蜀軍于上邽斬首數萬級

按通鑑王景敗蜀兵獲將

卒三百與宋史本傳不同

秦州降徙景鎮秦州兼西面緣邊都部署

恭帝立進封涼國公太祖即位加守太保封太原郡王

建隆二年來朝復以為鳳翔節度西面緣邊都部署四

年卒年七十五贈太傅追封岐王謚元靖景性謙退每

朝廷使至雖卑位必降階送迎周旋盡禮或曰王位尊

崇無自謙抑景曰人臣重君命固當如是惟恐不謹

耳初封郡王朝建以吏部尚書張昭將命景尤加禮重以
萬餘緡遺昭左右言其過厚景曰我在行伍間即聞張尚
書名今使于我是朝廷厚我也子廷義廷審廷訓廷義起
家供奉官周世宗擢為虎捷都虞侯遷龍捷右第二軍都
校領珍州刺史太祖即位改內外馬步軍副都軍頭開寶
二年加領橫州團練使從征太原廷義性勇敢親鼓士乘
城獨免胄矢中其腦而顛經宿卒年四十七太祖甚惜之
優詔贈建雄軍節度廷訓至驍衛大將軍致仕

王晏徐州滕人家世力田晏少壯勇無賴嘗率羣寇行
攻劫梁末徐方大亂屬邑皆為他盜所剽惟晏鄉里恃
晏獲全後唐同光中應募隸禁軍累遷奉國小校晉開
運末與本軍都校趙暉忠衛都校侯章等戍陝州會
契丹至汴遣其將劉愿據陝恣行暴虐晏與暉等謀
曰今契丹南侵天下洶洶太原劉公威德遠被若殺
愿送款河東取當貴如反掌耳暉等然之景乃率敢
死士夜踰城入府署斬愿首懸府門外遣其子漢倫

奉表晉陽時漢祖雖建號威聲未振得晏等來歸甚喜
即以暉為保平軍節度章為鎮國軍節度晏為絳州
防禦使既而暉等表晏始謀功為第一遷建雄軍節度
漢祖入汴加同平章事周祖即位加兼侍中廣順元年
劉崇侵晉州晏閉關不出設伏城上并人以為怯競攀
堞而登晏麾伏兵擊之顛死者甚衆遣漢倫追北數十
里擢漢倫濱州刺史周祖以晏家彭城授武寧軍節度
俾榮其鄉里三年封滕國公加開府階世宗加兼中書

令初晏至鎮悉召故時同為盜者遺以金帛從容置酒
語之曰吾鄉素多盜吾與諸君昔嘗為之後來者固當
出諸君下為我告諭令不復為若不能改吾必盡滅其
族由是境內安靜吏民詣闕舉留請為晏立衣錦碑世
宗初復請立德政碑世宗命比部郎中知制誥張正撰
文賜之詔改其鄉里為使相鄉勲德里私門立戟未幾
改河南尹西京留守顯德三年移鳳翔節度六年從世
宗北征為益津關一路馬軍都部署韓令坤副焉遂平

三闕太祖即位封趙國公從征李筠師還改安遠軍節度乾德元年進封韓國公上章請老拜太子太師致仕每朝會令綴中書門下班俄歸洛陽別墅四年冬卒年七十七贈中書令

郭從義字德基

據東都事畧補

其先沙陁部人父紹古事後唐

武皇忠謹特見信任賜姓李氏紹古卒從義纔卅角莊宗畜于宮中與諸子齒明宗與紹古同事武皇情好款狎即位以從義補內職累遷內園使晉天福初始復姓

郭氏坐事出為宿州團練副使丁內艱北歸遂家太原
漢祖在鎮表為馬步軍都虞侯屢率師破契丹于代北
及建大號從義首贊其謀擢鄭州防禦使充東南道行
營都虞侯領首軍自太行路渡河漢祖入汴以為河北
都巡檢使趙思綰之叛為行營都部署師至永興圍其城
即以從義為永興軍節度思綰糧盡城中人相食從義
繫書矢上射城中說思綰令降仍表于朝廷許以華州
節制隱帝遣使諭思綰思綰開門納款從義具軍容入

城憇候館中思綰入謁即令武士執之并其黨悉斬于
市加同平章事周廣順初加兼侍中移鎮許州世宗將
征劉崇從義適來朝因請扈從改天平軍節度令從符
彥卿破契丹于忻口以功加兼中書令從征淮南移鎮
徐州宋初加守中書令太祖征揚州從義迎謁于路顧
扈從不允乾德二年又為河中尹護國軍節度
乾德元年
年事六年以疾歸京師開寶二年改左金吾衛上將
軍逾年上章請老拜太子太師致仕四年卒年六十三

按東都
事畧作

贈中書令從善擊毬嘗侍太祖于便殿命擊之從義易衣跨驢馳驟殿庭周旋擊拂曲盡其妙既罷上賜坐謂之曰卿技固精矣然非將相所為從義大慚子守忠守信守信頗知書與士大夫游子世隆世隆子昭祐承祐

昭祐為閤門祇候

按宋史此下有從義曾孫承祐附傳無事蹟足錄今從刪又承祐傳後有

李洪信洪義二

傳已改入貳臣

武行德并州榆次人身長九尺餘材貌奇偉家甚貧常採樵鬻之自給晉祖鎮并門暇日從禽郊外值行德負

薪見其魁岸又所負薪異常令力士更舉之俱不能舉
奇之因留帳下晉天福初授奉國都頭遷指揮使累遷
寧國軍都虞候開運中契丹至汴行德被獲乃偽請于
契丹以自効契丹信之方具舟數十艘載鎧甲令行德
率將校軍卒送歸其國汴汴至河陰行德謂諸將曰我
輩與其離鄉井投邊塞為異域之鬼曷若與諸君驅逐
克黨共守河陽姑俟契丹兵退視天命所屬歸之衆素
服行德威名皆曰所向惟命行德即殺契丹監使分授

器甲由汜水倍道抵河陽契丹節度使崔廷勲

按隆平集東都

事畧俱作廷勲

出兵來拒行德麾衆逆擊廷勲大敗棄城走行

德遂據河陽盡以府庫分給將士因推行德知州事時

契丹兵尚充斥行德厲士卒繕甲兵據上游士氣益奮

人望歸之聞漢祖起太原即自稱河陽都部署遣其弟

行友間道奉表勸進漢祖即授行德河陽三城節度漢

祖由晉絳至洛行德以所部兵翼至京師還河陽乾祐

中加同平章事移真定尹成德軍節度廣順初加兼侍

中俄改忠武軍節度遷河南尹西京留守時禁鹽入城
犯者法至死告者給厚賞洛陽民家嫗將入城鬻蔬俄
有僧從嫗買蔬就筓翻視密窺鹽筓中少答其直不買
而去嫗持入城抱關者搜得鹽擒以詣府行德見盛鹽
襍非村嫗所有疑而詰之嫗言適有僧自城外買蔬取
視久之而去即捕僧訊治之具狀與關吏同誣嫗以希
賞行德釋嫗斬僧與抱關吏數輩人畏之若神明部下
凜然顯德初加開府階封譙國公世宗即位兼中書令

封邢國公先是唐末楊氏據淮南自甬橋東南決汴滙
為汙澤二年將議南征遣行德率所部丁壯于古隄疏
導之東達于泗上及親征以行德為濠州行營都部署
破淮軍二千餘人于郡境俄遣率師屯定遠以逼其城
為吳人所敗左授右衛上將軍五年下淮南復授行德
保大軍節度兼中書令恭帝立進封宋國公太祖即位
加中書令進封韓國公再授忠武軍節度改封魏國公
乾德二年冬移鎮安州加開府儀同三司開寶二年入

為太子太傅太平興國三年以本官致仕四年卒年七十二贈太師

楊承信字守真其先沙陀部人光遠第三子幼以父任自義武軍節院使領蘭州刺史歷宣武平盧二軍牙校開運初光遠以青州叛出帝遣李守貞等討之光遠死承信詣闕請死詔釋之及契丹滅晉以承信為平盧軍節度繼父職仕漢歷安祿二州節度累加檢校太師周廣順初如同平章事以郊祀恩加開府階封杞國公世

宗即位進韓國公顯德初征淮南為濠州攻城副都部署改壽州北砦都部署兼知行府事壽州平累戰功擢忠正軍節度同平章事恭帝立進封魯國公太祖即位加兼侍中來朝會征李筠命為澤州西面都部署筠平移鎮河中乾德元年進封趙國公二年卒年四十四贈中書令承信身長八尺美儀表善持論且多藝能雖叛臣之子然累歷藩鎮刻勵為政而不苟故能始終富貴其卒也蒲民表乞祠之則其遺愛之在人者可知矣景

德四年錄其孫松為奉職

按宋史此下有候章傳無事蹟足錄今從刪

折德宸世居雲中為大族父從阮自晉漢以來獨據府

州控扼西北中國賴之仕周至靜難軍節度使其鎮府

州時署德宸為馬步軍都校顯德初

按通鑑漢乾祐三年罷永安軍至周

顯德元年五月復置永安軍于府州以德宸為節度宋史作廣順間誤今改

周世宗建府州

為永安軍以德宸為節度使時從阮鎮邠寧父子俱領

節鎮時人榮之顯德中德宸率師攻下河市鎮斬并軍

五百餘級入朝以其弟德愿權總州事時世宗南征還

次通許橋德宸迎謁且請遷內地世宗以其素得蕃情
不許厚加賜賚而遣之德宸未至德愿又破并軍五百
餘于沙谷砦斬其將郝章張釗太祖即位德宸又破河
東砂谷砦斬首五百級建隆二年來朝待遇有加遣歸
鎮乾德元年敗太原軍于城下擒其將楊璘二年卒年
四十八贈侍中子御勲御卿

御勲字世隆德宸鎮府州日表為右職德宸卒以御勲
領汾州團練使權知府州事開寶二年太祖征太原御

勲詣行在謁見以為永安軍留後四年以郊祀來朝禮畢歸鎮九年郊祀西洛復來朝道病後期改奉寧軍節度使留京師太平興國二年卒年四十贈侍中

御卿幼補節院使御勲知州事署為兵馬都尉御勲徙鎮名為閑廐副使知府州太宗征河東命與尹憲領屯兵同攻嵐州又破岢嵐軍擒其軍使折令圖以獻遂下

嵐州又殺其憲州刺史霍翊又擒其將馬延忠等七人

遷崇儀使

按隆平集作御卿授閑廐副使改崇儀使知府州據此則御卿知府州乃在遷崇儀使後

也與史
淳化三年凡四遷而為府州觀察使五年拜永
互異

安軍節度使既而契丹衆萬餘來侵御卿大敗之于子
河汭自是契丹畏不敢深入太宗因遣使問御卿曰西
北要害皆屯勁兵戎人何自而至御卿對曰敵緣山峽
小徑入謀剽掠臣諜知之遣人邀其歸路因縱兵大擊
敗走之人馬墜崖谷死者相枕其大將韓德威僅以身
免皆聖靈所及非臣之功也帝嘉之歲餘御卿被病契
丹諜知之且為李繼遷所誘率衆來侵以報子河汭之

役御卿力疾出戰契丹聞其至不敢進會疾甚其母密遣人名歸御卿曰世受國恩遑寇未滅御卿罪也今臨敵棄士卒自便不可死于軍中乃其分也為白太夫人無念我忠孝豈兩全言訖泣下翊日卒年三十八帝聞悼惜久之贈侍中以其子惟正為洛苑使知州事惟正歸朝以其弟惟昌繼之咸平二年河西黃女族長蒙異保及惟昌所部吸訛引趙保吉之衆入寇麟州萬戶谷進至松花砦惟昌與從叔同巡檢使海超弟供奉官惟

信率兵赴戰會保吉兵衆官軍不敵惟昌臂中流矢墜馬攝弓起得裨將馬突圍出海超惟信沒焉九月保吉黨萬私保移埋復來寇惟昌與宋思恭劉文質合戰于埋并峯敗走之又破言泥族拔黃砦斬甚衆以功領富州刺史改文思使景德元年與王萬海等破賊砦護芻糧抵麟州秋入朔州界破狼水砦時契丹方圍岢嵐軍聞敗遁去明年拜興州刺史大中祥符二年表求赴闕真宗命近臣與射于苑中宴賜甚厚上言先臣御卿

蒙賜旗三十竿以壯軍容請別給賜許之七年命河東民運糧赴麟州當出兵為援惟昌力疾領步騎屯寧遠皆冒風沙而行時疾已亟猶與賓佐宴飲談笑自若焉明日卒年三十七以其弟惟忠繼之惟忠字蓋臣初以兄惟信戰沒補西頭供奉官擢閤門祗候及惟昌卒以惟忠為六宅使知府州兼麟府路都巡檢使領晉州刺史累進簡州團練使雲麾將軍卒惟忠知兵事天聖中契丹與夏國會兵境上聲言嫁娶惟忠覘得其實率麾

下往備之戒士卒毋輕動一夕風霾有騎走營中皆以
為寇至惟忠堅卧不動徐命擒之得數詎馬蓋敵所縱
也既卒錄其弟姪子孫七人以其子繼宣嗣州事久之
特贈惟忠耀州觀察使寶元中繼宣坐苛虐掊刻種落
嗟怨紂為左監門衛將軍楚州都監擢其弟右侍禁繼
閔為西京作坊使嗣州事繼閔字廣孝慶厯中元昊兵
攻麟州不克進圍州城險且堅東南有水門屋壁峭
絕阻河賊緣崖腹微徑魚貫而前城中矢石亂下賊轉

攻城北士卒復力戰死傷甚衆遂引去圍豐州豐州
遂陷繼閔以城守勞特遷宮苑使普州刺史未幾護送
麟州戍卒冬服賊伏兵邀擊之盡掠所齎繼閔脫身由
間道歸會赦止奪宮苑使後復官領果州團練使自元
昊反繼閔招輯歸業者三千餘戶皇祐二年卒以其弟
繼祖嗣州事繼祖字應之由右侍禁累遷成州團練使
臨政二十餘年奏乞書籍仁宗賜以九經韓絳發河東
兵城婁繼祖為先鋒深入敵帳降部落戶八百加解州

防禦使卒繼祖有子當襲州事請以授兄之子克柔詔從之而進其三子官錄二孫為借職弟繼世少從軍為延州東路巡檢威明山之內附繼世先知之遣其子克懃報种諤諤用是取綏州繼世以騎步萬軍于懷寧砦入晉祠谷往銀川分明山之衆萬五千戶居于大理河夏人來攻再戰皆捷諤抵罪逮繫獄以兵付之而行遂同明山守綏州錄功領忠州刺史說韓絳城婁以撫橫山因盡取河南之策絳以為然以左驤驥使果州團練

使卒諸司使無賻禮詔以繼世蕃官捍邊有績特給之
從子克行

克行字遵道繼閔子也初仕軍府無所知名夏人寇環
慶种諤拒之詔河東出師為援克行以兵三千護餉道
戰于葭蘆川先登斬級四百降千戶馬畜萬計諸老将
矍然曰真折大尉子也擢知府州克行每出必勝夏人
畏之益左廂兵專以當折氏太原孫覽議城葭蘆諸將
論多不合召克行問策即條具所見頓兵吐渾河約勒

部伍為深入窮討狀敵疑不敢動遂城葭蘆既訖役會
詔河東進築八砦通道郿延延帥遣秦希甫來議築先
後克行請兩路併力乘士氣之銳先遠役以出其不意
希甫持不可并上二議卒用克行策城成謀言寇至軍
中皆戒嚴克行止之曰彼自擾耳已而果然克行在邊
三十年善拊士卒戰功最多羗人呼為折家父官至秦
州觀察使卒贈武安軍節度使子可大為榮州團練使
知府州從子可適未冠有勇馳射不習而能郿延郭達

見之嘆曰真將種也薦試廷中補殿侍隸延州從种諤
出塞遇敵馬以少年易之可適索與鬪斬其首取馬而
還益知名米脂之役與夏人戰三角嶺得級多又敗之
于蒲桃谷夏人十萬入寇可適先得其守烽卒姓名詐
為首領行視呼出盡斬之烽不傳因卷甲疾趨大破之
于尾丁磴回次檉楊溝正午駐營分騎據西山曰彼若
躡吾後腹背受敵必敗果舉軍來可適所部纔八千轉
戰至高嶺乃從間道趣洪德設伏邀其歸路敵至伏發衝之

其國母踰山而遁衆相蹈藉赴厓澗死者如積論前後功至皇
城使成州團練使知岷蘭州鎮戎軍渭師章榘合熙秦慶三
道兵築好水川命總管王文振統之而可適將軍為副
熙州兵千人失道盡死文振歸罪于可適榘即下之吏
宰相章惇欲按軍法哲宗不許猶削十三官而罷榘請
留以責效乃以權第十二將威明阿密密勤都克頗皆
夏人桀黠用事者詔可適密圖之會二酋以畜牧為名
會境上可適諜知之遣兵夜往襲并俘其族屬三千人

遂取天都山以其地為西安州遷可適知州事鍾傳議
取靈武可適入覲帝以傳策訪焉對曰得之易守之難
當先侵弱其地待吾藩籬既固然後可圖帝曰卿言是
也進武安軍節度觀察留後步軍都虞候大城蕭關與
傳議齟齬會覆師數百于臨口傳劾之貶鄭州觀察使
俄知衛州拜淮康軍節度使轉運使請于平夏通峽鎮
戍西安四砦分築場圃置芻粟五百萬可適以費大難
之又欲借車牛以運及致十萬斛于熙河皆戾其意乃

中以疑謗召為佑神觀使明年復以為渭州命其子彥

質直秘閣參軍事數月而卒年六十一彥質紹興中簽

書樞密院別有傳

按宋史比下有馮繼業傳繼業有
弒兄之惡并無事蹟足錄今從刪

王承美豐州人本河西藏策族都首領其父事契丹為

左千牛衛將軍開寶二年率眾來歸承美授豐州牙內

指揮使父卒改天德軍蕃漢都指揮使知州事移豐州

刺史遣軍校詣闕言願誘退渾突厥內附帝嘉其意太

平興國七年與契丹戰斬獲以萬計擒其天德軍節度

使韋太以獻明年契丹來侵又擊敗其衆萬餘追北至青冢百餘里斬獲益衆以功授本州團練使淳化二年冬來朝令歸所部控子河汭自是諸蕃歲修貢禮頗効忠順景德初遷本州防禦使尋請于州城置孔子廟詔可之大中祥符五年卒贈恩州觀察使六年錄其子文寶孫懷筠以官

李繼周延州金明人祖計都父孝順皆為金明鎮使繼周嗣掌本族太平興國三年東山蕃落集衆寇清化砦

繼周率衆敗之補殿前承旨雍熙中又與侯延廣敗默
藏瑪雅爾等族于渾州西山淳化五年討李繼周遷命
開治塞門鴉兒兩路又詔降族帳首二十餘人率所部
入夏州敗蕃將數千于石堡砦以功轉供奉官繼周以
阿都闢塞門盧關等砦最居邊要遂規修築砦城有摩
羅木嘉密默伊藏等族居近盧關未嘗內順繼周夜率
所部往襲焚之斬獲甚衆大軍討西夏命為延州路踏
白先鋒會繼遷邀戰于路繼周戰却之咸平三年復為

先鋒入賊境焚積聚殺獲人畜器甲凡六十餘萬授供
備庫使領金明縣兵馬都監新砦解家河盧闢路都巡
檢蕃騎入鈔繼周逐之出境景德元年夏人圍麟州繼周受
詔率兵會李繼福掩擊之加領誠州刺史大中祥符二
年卒年六十七詔邊臣擇其子可襲職者以名聞邊臣
言其子殿直士彬遜悞從子士用朴忠練邊事且為部落
所伏乃詔士彬管勾部族事士用為巡檢都監以左右
之士彬後至供備庫副使金明縣都監新砦解家河盧

闕路巡檢康定元年元昊攻保安軍而潛兵襲金明士
彬父子俱被擒士彬兄士紹至內殿崇班士用至供奉
官閣門祇候李繼福者亦與繼周同時歸順授永平砦
戛村軍主以戰功歷歸德將軍領順州刺史至內殿崇

班新歸明諸族都巡檢

按宋史此下有孫行友傳行友以左道惑衆已見五代史其兄

方諫傳中入宋後無事蹟足錄今從刪

孫全照字繼明行友子以蔭補殿直從田重進擊賊有功就加西京作坊使兼知威虜軍連為廣韶鄜延二路

都巡檢使淳化五年率兵與李繼隆克綏州因與張崇
貴等同戍守之俄護屯兵于夏州兼知州事景德元年
上辛潭淵命為駕前西面邢洛路馬步軍鈐轄兼天雄
軍駐泊兼管勾東南貝冀等州鈐轄全照言若敵騎南
逼魏城但得騎兵千百必能設奇取勝帝賞其忠果乃
傳詔都部署周瑩若全照欲擊賊即分兵給之既而邊
騎果逼府城全照拒退之真宗遣使勞慰時契丹請和
朝廷遣曹利用就其行帳議事全照疑非誠懇勸判府

王欽若留不遣故德清軍不能守吏民多為賊所害及契丹出境北面將帥還師併至府城全照令以次雙行入門魏能不從其約率兵馬坐入全照坐城樓引弓射之欽若入朝就命全照知軍府事以城守勞加檢校工部尚書徙鎮州全照形短精悍知兵以嚴毅整衆然性剛使氣專任刑罰中書初進擬嚴州刺史帝曰全照深刻常慮人以嚴察議已今授此州似涉訛諛乃改焉三年為邠寧環慶都部署趙德明納欵朝議減西鄙戍兵

令屯近地全照以邊防不可無備未即奉詔帝曰全照是好勇多言者德明使已至闕復何慮焉因徙全照知永興軍府仍拜四方館使西師移屯者至府命全照兼駐泊鈴轄全照許州有別墅求典是州可之大中祥符四年車駕西幸留為新城都巡檢未幾卒年六十

按宋史此

下有侯益傳改入貳臣其子仁矩仁實附傳今並刪

侯延廣太子太師益之孫初在襁褓中遭王景崇之難乳母劉氏以已子代延廣死劉氏行丐抱持延廣至京

師逐益延廣父仁矩歷通祁雄三州刺史悉以補牙職
仁矩在雄州日方飲宴虜數十騎白晝入州城居民驚
擾延廣引數騎馳出牙門射殺其酋長一人斬首數級
悉擒其餘黨延廣持首級以獻仁矩喜拊其背曰興吾
門者必汝也監軍李漢超以其事聞詔書褒美賜錦袍
銀帶仁矩卒補西頭供奉官從黨進討太原太平興國
初出護延州軍兼緣邊巡檢善撫士卒下樂為用戎人
畏服會西北戎寇邊求可使徼巡者近臣言延廣將家

子習邊事無出其右延廣時被病強起之遷崇儀副使
充同鄜坊延丹緣邊都巡檢使戎人聞延廣之至不敢
復為寇亂叛卒劉渥嘯聚亡命數百人寇耀州富平縣
謀入京兆其勢甚盛關右騷然延廣率兵自間道追之
會渥于富平西十五里渥衆已千餘人延廣挺身與渥
鬪大樹下斷渥右臂渥脫走乘勢大破其衆渥創甚止
谷中後數日為追兵所獲渥素號驍勇無敵至是為延
廣所殺羣盜喪氣餘黨稍稍自歸關右以定擢拜崇儀

使淳化二年李繼遷始擾夏臺即命延廣領興州刺史知靈州趙保忠陰結繼遷朝廷命騎將李繼隆率兵問罪以延廣護其軍既而夏臺平保忠就縛手詔褒美師還留為延州鈐轄會節帥田重進老耄以延廣同知州事兼緣邊都巡檢使先是延廣知靈州部下嚴整戎人悅服李繼遷素被其鋒監軍康贊元害其功誣奏延廣得虜情恐後倔強難制遽詔還以慕容德豐代之部內甚不治至道間繼遷寇靈州朝廷謀帥同知樞密院事

錢若水稱延廣可使就拜寧州團練使知靈州兼兵馬都部署戎人塞道郵傳餉餽皆不通延廣獨引數十騎之鎮戎人素服其威名皆相率引避二年春被病上遣御醫馳驛視之醫至疾已亟延廣謂中使李知信曰延廣自度必不起家世受國恩今日得死所矣但恨未立尺寸功以報上耳言訖而卒年五十帝以其子為六品正員官子紹隆東染院使紹隆子宗亮右侍禁閤門祇

候
按宋史此下有張從恩傳從恩在漢時以右衛上將軍奉朝請入宋後未柄用無事蹟足錄今從刪

扈彥珂代州鴈門人幼事王建立晉天福中建立節制
潞州卒遺表薦彥珂得補河東節度左都押衙會漢祖
建號擢為宣徽南院使未幾授鎮國軍節度使乾祐初
河中李守貞永興趙思綰鳳翔王景崇並據城叛周祖
為樞密使總兵出征道出華州時議多以先討景崇思
綰為便周祖意未決彥珂曰三叛連衡推守貞為主宜
先擊河中河中平則永興鳳翔失勢矣今捨近圖遠若
景崇思綰逆戰于前守貞兵其後腹背受敵為之奈何

周祖從其言及平河中以功遷護國軍節度廣順初就
加同平章事移鎮滑州歲餘代歸世宗嗣位授左衛上
將軍顯德三年以太子太師致仕歸西京太祖即位遣
使就賜器幣數月卒年七十五按宋史此下有薛懷讓
趙贊二傳懷讓在周時
以左武衛上將軍致仕入宋後未柄用無事蹟足
錄今從刪贊係延壽子改附貳臣傳延壽傳後



欽定續通志卷二百九十八